

*Evelyn Wever-Croes (MEP):*

## Den number di pueblo di Aruba nos ta gradici Sra. Ella Tromp-Yarzagaray como gobernador interino



**STA. CRUZ – Durante conferencia di prensa semanal di MEP lider di MEP Sra. Evelyn Wever-Croes a comparti su palabranan di gratitud na Sra. Ella Tromp-Yarzagaray, cu el a expresa durante su discurso den Parlamento diamars ultimo.**

“Sra. Ella Tromp-Yarzagaray a cuminsa su carera politico na año 1989, y prome cu esey a traha den mundo di accounting, y den enseñansa. Sra. Tromp a sirbi pueblo den Parlamento, y despues tambe como Minister Plenipotenciario y como minister di fi-

nancia.

Mi tabata tin e dicha di por a traha den departamento di impuesto tempo cu Sra. Tromp tabata nos minister, y mi a keda semper impresiona pa e forma firme, pero alabes suave cu e tabata maneha e ministerio. Ta asina Sra. Tromp a logra pa prome biaha den nos historia, un surplus den presupuesto di pais Aruba. Un logro cu despues ta un minister so mas a logra, Sr. Nilo Swaen. Algo cu durante e ultimo 7 añanan aki nos por soña so, sin por realisa esey. Esaki na mi aparece a definí e carera di Sra. Tromp.

Un otro punto culminante ta

na momento cu Sra. Tromp mester a atende e apertura di año parlamentario na September 2014, despues di e Koninklijk Besluit of “KB”, na momento cu e fraccion di AVP a bin bisti completamente na preto como protesta contra Sra. Ella Tromp-Yarzagaray. Naturalmente esaki no tabata algo facil, sinembargo e grandesa y dignidad cu Sra. Tromp-Yarzagaray a demostra den e momentonan ey, a laga e accion di protesta mas bien musta como algo infantil.

Sra. Tromp, of “Ella” manera tur hende conoc’e, a keda semper un persona humilde, cu

oido pa tur hende, y semper cla pa duna un ayudo of un consejo. El a sa di ocupa e cargo di gobernador interino na forma digno, cu elegancia y clase. Algo cu Aruba en general, y e gran famia di MEP en special ta sumamente orguyoso di dje. Como hende muhe den politica, Sra. Tromp a inspira hopi, y ami sigur. El a demostra cu apesar cu e tabata tin un famia hoben, yiunan chikito, asina mes e por a combina e responsabilidadnan di su hogar y e responsabilidadnan di cargo nan di representante di pueblo den Parlamento y di minister na mas di un ocasion, y ehersce ambos responsabilidad na for-

ma excelente. Esaki ta un inspiracion pa hopi hende muhe.

Den number di pueblo di Aruba en general, e gran famia di MEP en special y sigur e pueblo di Paradera, mi ta gradici y felicita Sra. Ella Tromp-Yarzagaray, pa e forma digno cu el a ehersce su cargo di gobernador interino. Nos ta sumamente orguyoso di esaki. Mi ta gradici tambe su esposo Leo, su yiunan, nietonan, y famianan pa a permiti Sra. Tromp sirbi nos pueblo pa asina tanto tempo. Cu Dios bendiciona Ella y famia ricamente”, tabata palabranan di lider di MEP Evelyn Wever-Croes.